

## Badiliko la Neema,

*Lakini mwisho wa mambo yote umekaribia; basi, iweni na akili, mkeshe katika sala.*  
**1 Petro 4:7.**

[Kristo] anapendezwa pale watu Wake wanapoonesha uthabiti, uwezo na uimara wa tabia zao na pale wanapokuwa wachangamfu, wenye furaha na moyo wenye matumaini.

Petro anasema, "Kwa hiyo vifungeni viuno vya nia zenu, na kuwa na kiasi, mkiitumainia kwa utimilifu ile neema mtakayoletewa katika ufunuo wake Yesu Kristo." Hapa kuna fundisho la kujifunza; hapa kuna wajibu wa kufanya kudhibiti nia zetu, tusiruhusu kufuatisha mawazo tuliyokatazwa au kutumia nguvu zetu katika mada za upumbavu. "Lakini mwisho wa mambo yote umekaribia; basi, iweni na akili, mkeshe katika sala." Hatutakiwi kuomba pekee bali pia kujihadhari katika maneno na matendo yetu na hata fikra zetu na "kukeshwa katika sala." Ikiwa akili zetu zitawaza juu ya mambo ya kimbingu, mazungumzo yataenda katika mtitiriko huo huo. Moyo utajazwa tumaini la Kristo, ahadi kubwa na za thamani zilizobaki katika kumbukumbu kwa ajili ya kututia moyo; na furaha yetu katika mtazamo wa rehema na wema wa Mungu haupaswi kuzimwa; ni furaha ambayo hakuna mwanadamu awezaye kutunyang'anya.

Katika muda wa kuamka, akili muda wote itakuwa ikitumika ... Kunaweza kuwa na kujitokeza kwa ghafula kwa mawazo ya kumbukumbu za nyuma; Mawazo hayajaadhibitiwa kwa tafakari tulivu na makini. Kuna mada zinazohitaji uangalifu mkubwa. Kuna zile zinazohusiana na mpango wa ukombozi, ambao hivi karibuni utakamilika. Yesu yuko karibu kuonekana katika mawingu ya mbinguni, na ni aina gani za tabia tunapaswa kuwa nazo zitakazotuwezesha kusimama katika siku ile? Kwa kuzitafakari mada hizi zenye maslahi ya milele, akili inaimarishwa na tabia kukuzwa. Hapa ndipo penye msingi wa kanuni ile thabiti isiyoyumba, aliyokuwa nayo Yusufu. Hii ndiyo siri ya kukua katika neema na katika ufahamu wa ukweli.

Dini ya Kristo si kile wengi wanachodhani, wala kile maisha yao yanachodhihirisha kuwa. Upendo wa Mungu kwa mwanadamu utakuwa na mvuto katika maisha, na utazifanya akili na matamania kutumika, katika matumizi yenye manufaa. Mtoto wa Mungu hatatulia na kuridhika hadi pale atakapovikwa vazi la haki ya Kristo, na kutegemezwa kwa nguvu Yake itoayo uzima. Pale aonapo udhaifu katika tabia yake, haitoshi tu kufanya toba kila mara; anapaswa kwenda kufanya kwa kuazimia na kwa nguvu kuushinda udhaifu wake kwa kujenga tabia zinazopingana na tabia hiyo. Hatajitenga na kazi hii kwa sababu ni ngumu. Nguvu ya Mkristo isiyochoka inahitajika; lakini hashurutishwi kufanya kazi kwa kutumia nguvu zake; nguvu za Mungu zinangoja hitaji lake. Kila mmoja anayepambana kwa uaminifu kwa ajili ya kuishinda nafsi yake atapokea ahadi hii, "Neema yangu yakutosha"

**(The Review and Herald, Juni 10, 1884).**